

Uunga siunnersuut: Kalaallit Nunaanni sullivinni avatangiisit pillugit inatsisip allanngortinneqarneranik aamma Kalaallit Nunaanni sulisilluni ajoqusersinnaanermut isumannaarineq pillugu inatsisissatut siunnersuut pillugu Namminersornerullutik Oqartussat oqaaseqaatissaat pillugu Inatsisartut aalajangiiffigisassaattut siunnersuut
(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Saqqummiussissut

(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Siullermeerneqarnera

Danskit naalakkersuisuisa Kalaallit Nunaanni sullivinni avatangiisit pillugit inatsisip aamma sulisilluni ajoqusersinnaanermut isumannaarineq pillugu inatsisip allanngortinneqarnissaat pillugu inatsisissatut siunnersuut suliaaraat.

Inatsisissatut siunnersuummi ilaatigut sulisut navianartorsiornermi suliffimminnik qimatsisinnaatitaanerat qulakkeerneqarpoq.

Siunnersuummi aamma Sullivinnik Nakkutilliisoqarfiup nakkutilliinermik suliaqarnerup annertunerulerneranut, nunami aatsitassanik piiaaaneq aamma erngup nukinganik atuineq pillugit suliniutit arlallit ingerlanneqassappata, pisariaqartinneqalertussamut, aningaasartuutit qaffakkiartornissaat pinngitsoortinneqassaaq. Tamanna assersuutigalugu suliniutinut angisuunut atatillugu pisussanngorsinnaavoq.

Siunnersuut aamma ILO-p aatsitassarsiorfinni isumannaallisaaneq peqqinnissarlu pillugit nunani tamalaani isumaqatigiissutaata nr. 176-ip atuutsinneqalernissaanut ilaavoq. Siunnersuut taamaalilluni aatsitassanut suliaasaqarfimmi nunani tamalaani suleriaatsit pitsaanerpaat qularnaarnissaannut iluaqutaassaaq, tamannalu ukiorpassuit ingerlaneranni aatsitassanut suliaasaqarfimmi, nunatta aatsitassanut nunarsuarmi niuerfimmi suliaqartuusutut pilerinaateqartutut inissitsinnissaa pillugu politikkimut siunnerfigineqarpoq pingaaruteqartoq.

Siunnersuummi aamma Sullivinnik Nakkutilliisoqarfiup aamma Arbejdsmarkedets Erhvervssikring-ip akornanni paasissutissanik katersisarneq paarlaasseqatigiittarnerlu pillugit suleqatigiinneq annertusitinneqassaaq. Siunertaavoq ajutoornerit pillugit ilisimasat aamma kisitsisitigut paasissutissat avitseqatigiissutigisarnissaat, taamaalilluni Sullivinnik

Nakkutilliisoqarfiup nakkutilliinini siunnerfeqarnerulersissinnaassallugu. Tamanna sulisilluni ajoqusernernik sunniuteqarluarnerusumik pitsaaliuisinnaanissatsinnut iluaqutaassasoq neriunarpoq.

Siunnersuummi aamma akuutissat uumaatsut navianartut imaluunniit atortussat naleqqutinngitsumik atorneqartarnerat annikillisinneqassaaq.

Taamatut oqaaseqarlunga siunnersuut Inatsisartunit suliarineqassasoq inassutigineqarpoq.